

史外

二

史外卷四

張姬石三縣令合傳

張公諱振德字季修崑山人以選貢授四川興文知縣天啟元年永寧僞奢崇明爲亂殺巡撫藩臬據重慶當是時公署長寧縣賊鋒逼興文而長寧去賊稍遠公方被檄入聞聞變疾趨還從者欲走長寧公以守興文爲正趨入縣而賊猝至公督鄉兵與戰力盡援絕退集居民城守會大風雨賊毀土城入公度不支入署命妻錢二女淑昭淑慶等人持一刀坐後堂曰若輩死此吾死前堂左手持兩印

右手秉匕首危坐賊至佯慰曰無恐公叱曰大丈夫從容就義何恐之有俄而賊焚民舍公曰此吾授命時矣遂率家人北向拜曰臣奉職無狀不能殺賊惟一死明志妻女先伏劍死薪上僕婦皆從乃命家人舉火火熾自刎一門死者九人事聞贈光祿卿諡烈愍而長寧王簿徐大禮者聞公死嘆曰張君教我矣城破之日亦仰藥而絕明年有姬公死滕縣之事

姬公諱文允字士昌華州人萬厯癸卯舉人天啟二年爲滕縣令履任三日而白蓮賊徐鴻儒攻滕時滕民十九從

賊公率以登陴僅數十人問民何以從賊曰禍由董二董
二者延綏巡撫董國光子也居鄉貪暴民不聊生故爲亂
公呼賊曰若等以董二故挺而走險吾爲治其罪以雪若
冤而赦若等可乎公長身赤面鬚髯奮張唇齒如施丹漆
呼聲殷殷動樓櫓賊望見以爲神人歡呼羅拜俄而董二
之黨暗發箭斃賊賊謂公給之大憤肉薄而上城遂破公
緋衣坐堂上嚼齒大罵胡不速殺我賊不忍勸之去不可
爲詩八章書於壁解印付小吏魏顯照及僕李守務北向
再拜自縊死賊拷掠顯照索印不予與守務罵賊竝死之

事聞贈公太僕寺少卿並錄顯照守務復其家而董二遁去其後卒以賄免明年又有石公死長興之事

石公諱有恒字季常號雲岫黃梅人萬厯己未進士授浙江遂安令調長興時劇盜葉朗山吳野樵等結島寇爲亂剽掠無虛日公設方畧擒其魁賊稍戢而餘衆散處湖蕩間公分兵搜捕甚急癸亥正月朔賊乘元旦節詭裝突入城大肆焚掠公聞變出立廳事辦嚴賊露刃脅之公叱曰草賊敢叛天子殺王臣耶索印不可強之行不可以刃傷其長子確亦不顧賊擁之出儀門公曰頭可斷此限不可

忽插入此
段議論激
宕盤迴于
本傳諸人
心緒極流
連眼光又
似別注有

踰也遂被害血上瀆移時不仆主簿徐可行奔赴亦死之
賊搜其篋無所得相顧驚歎稱爲真正清官贈太僕寺少
卿諡忠烈嗚呼熹宗之時賊禍已如此其屠陷城邑先後
以死殉者不可勝紀也吾得數人焉其他抗節者野史及
諸家傳記頗往往附見矣然或崖畧而不詳亦或依違瞻
徇拘牽忌諱宣傳者而不傳幸託於諸家傳記者或文不
能行遠則雖傳猶不傳又或有如昌黎廬陵輩間世而出
或不幸不及知知而未暇爲時往事移鄉里鮮有能舉其
姓字者則忠魂義魄噉狐貉而隨飄風黃土青燐憂悲沉

之奇

龍蛇山沒

痛亦付之無可如何而已矣豈不惜哉予故謹次而錄之
南溪則知縣王碩輔守城禦寇力屈死灌縣則知縣左重
督兵援省與賊對陣死遵義則推官馮鳳鵬罵賊死司獄
蘇樸墜城死威遠則經歷袁一修亦墜城死大足則主簿
張志譽典史宋應臯與賊持四晝夜並僕張成俱戰死合
州則鄉官原任鞏昌同知董盡倫率衆殺賊死永寧則鄉
官原任松潘道叅政李忠臣約衆擒賊謀洩賊掩至被執
不屈死舉人胡復亦死之瀘州則鄉官原任應天通判高
光削髮作偈曰君父誼尊削髮自盟臣子守定畱鬚爲證

與子諸生高在崑募兵復城殺賊百人死重慶則巡撫徐
可求罵賊死巡道孫好古駱日升相對自經公署知府章
文炳推官王三宅郭象儀楊愈懋同知王世科熊嗣先知
縣段高選訓導趙燿典史吳應元縣丞蕭美葛盛德總兵
黃守魁叅將萬金守備劉自靖孫世侯毛民望王守忠李
繼周遊擊李縉指揮王登爵韓應泰崔英李世勳李承宗
鎮撫郁聯若干總王成龍千戶鄭應欽百戶范之偉張羽
汪起蛟俱戰死嗚呼是數公者具見於鄒漪野乘其出處
本末與死事年月皆未之詳予亦未暇深考也抑又聞張

烈愍公殉難後教諭劉公希文華容人貢生署縣事甫半
載賊復至城破妻白氏從容語曰君爲臣死予爲君死盡
遣去家人同罵賊以殉此則其本末畧可考者矣吁

張忠烈等傳

公諱銓字宇衡沁水人萬厯甲辰進士授保定推官擢御史巡視陝西茶馬內艱歸起按江西時遼東總兵官張承蔭敗歿而經畧楊鎬方議四道出師公馳奏言敵山川險易我未能悉知懸軍深入保無抄絕且突騎野戰敵所長我所短以短擊長以勞赴逸以客當主非計也昔臚胸河之戰五將不還奈何輕出塞爲今計不必徵兵四方但當就近調募屯集要害以固吾圉厚撫北關以樹其敵多行間諜以攜其黨然後伺隙而動若加賦選丁騷擾天下恐

識者之憂不在遼東因請發帑金補大僚宥直言開儲講
先爲自治之本又言李如栢杜松劉綎以宿將並起宜責
鎬以一事權唐九節度相州之潰可爲明鑑又言廷議將
恤承蔭夫承蔭不知敵誘輕進取敗是謂無謀猝與敵遇
行列錯亂是謂無法率萬餘之衆不能死戰是謂無勇臣
以爲不宜恤又論鎬非大帥才而力薦熊廷弼四十八年
夏復上疏言自軍興以來所司劄議加賦增銀三厘未已
幾至七厘又未幾至九厘譬之一身遼東肩背也天下腹
心也肩背有患猶藉腹心之血脉滋灌若腹心先潰危亡

國計民生
詳哉言之
具見深心
大力非浪
費筆墨者

可立待竭天下以救遼遼未必安而天下已危今宜聯人
心以固根本豈可腴削無已驅之使亂且陛下內廷積金
如山以有用之物置無用之地與瓦礫何異乃發帑之請
叫闥不應加派之議朝奏夕可臣殊不得其解蓋神宗初
載張居正當國海內寧謐民則人給家足居正去遂多故
培克日用事國計浸以促耗自萬厯二十年寧夏用兵費
帑金二百餘萬其冬朝鮮用兵首尾八年費帑金七百餘
萬二十七年播州用兵又費帑金二三百萬三大征接踵
國用大匱而二十四年乾清坤寧兩宮災二十五年皇極

建極中極三殿災營建之資以鉅萬萬而遼難日亟軍興益以繁費於是礦稅之使四出縱橫繹騷吸髓飲血天下蕭然生靈塗炭公所言皆關軍國安危而帝與當軸卒不省縱松敗時謂公有先見云熹宗卽位出按遼東經畧袁應泰下納降令公力爭不聽曰禍始此矣應泰字大來鳳翔人萬曆乙未進士用兵非所長規畫頗疎廷弼在遼持法嚴部伍整肅應泰以寬矯之多所更易而是時蒙古諸部大饑多人塞乞食應泰言我不急救則彼必歸敵是益之兵也乃下令招降於是歸者日衆處之遼瀋二城優其

月廩與民雜居潛行淫掠居民苦之議者言收降過多或陰爲敵用或敵雜間諜其中爲內應禍且叵測應泰方自詡爲得計將借以抗 大兵會三岔兒之戰降人爲前鋒

死者二十餘人應泰遂用以釋羣議明年天啟改元三月十有二日 大兵攻瀋陽總兵賀世賢尤世功出城力戰敗還明日降人果內應城遂破二將戰死總兵陳策董仲揆等赴援亦戰死公請令遼東巡撫薛國用帥河西兵駐海州薊遼總督文球帥山海兵駐廣寧爲聲援疏甫上而遼陽失守矣方遼陽之被圍也公與應泰分城守已而勢

不支應泰謂公曰泰不才微尙方靈寵固誓以身許按臣
無閫外責尙可收拾餘燼退保河西以圖再舉公不可曰
吾世受國恩豈有城破身存之理守三日城破被執不屈
欲殺之引頸就刃帥知不可奪送之歸公曰歸亦何顏速
死爲幸則以輿送之不從以馬送之不從乃令二人夾持
之送還署衣冠向闕拜又遙拜父母遂自經事聞贈大理
卿再贈兵部尙書諡忠烈父五典厯官南京大理卿時侍
養家居詔以公所贈官加之及卒贈太子太保初五典度
海內將亂築所居實莊爲堡堅甚崇禎四年流賊至五典

已歿獨公妻霍氏在衆請避之曰避賊而出家不保出而
遇賊身更不保等死耳盍死於家乃率僮僕堅守賊環攻
四晝夜不克而去副使王肇生名其堡曰夫人城鄉人避
賊者多賴以免公形貌魁傑豐頤廣顙頰頰而髯望之知
爲偉人先是保定有兩是亭以祀楊中丞繼宗許忠節達
公理郡夢入亭兩公向公而揖曰方虛席以待殆先徵云
同時殉難者有守道何公監軍崔公（按明史無許達亦
無許姓諡忠節者查孫忠烈傳附許忠節名達疑達或達
字之訛惟楊中丞繼宗曾官順天巡撫而許忠節達併未

歷官畿輔楊後卒官雲南許則殉難江西二公時代相隔
事蹟判然不同不知何以並祀

何公諱廷魁字汝謙山西大同人萬曆二十九年進士授
涇縣令調寧晉遷刑部主事歷歸德衛輝河南知府西寧
副使坐考功法復爲黎平知府會遼事棘遷副使分巡遼
陽袁應泰納降公爭不聽乃貽書家人曰吾不知死所矣
瀋陽陷同事者遣孥歸公曰吾不敢爲民望 大兵渡河
公請乘半渡擊之應泰不從俄薄城圍未合請盡銳出禦
又不從城陷泣語左右曰吾負若屬其自爲地無顧我也